

Uunga siunnersuut: Nappaatit tunillaassortut akiorniarlugit iliuitsit pillugit Inatsisartut inatsisaat

(Peqqissutsimut Naalakkersuisoq)

Saqqummiussissut

(Peqqinnissamut Naalakkersuisoq)

Siullermeerneqarnera

Naalakkersuisut sinnerlugit matumuuna Nappaatit tunillaassortut akiorniarlugit iliuitsit pillugit Inatsisartut inatsisissaattut siunnersuut saqqummiutissavara.

Europami COVID-19-imik tuniluuttoqarnerata kingunerisaanik Kalaallit Nunaanni pissutsit immikkut ittut pissutigalugit Nappaatit tunillaassortut akiorniarlugit iliuitsit pillugit Inatsisartut inatsisaat 1. april 2020-mi allanngortinneqarpoq.

Inatsimmut allannguummi atorunnaarsitsinissamut aalajangersagaq ilanngunneqarpoq, Nappaatit tunillaassortut akiorniarlugit iliuitsit pillugit Inatsisartut inatsisaat tamakkiisumik 31. december 2021-mi atorunnaartussanngortillugu. UKA2021-mi Inatsisartut atorunnaarsitsinissamut piffissaliussaq 1. juli 2022-mut allanngortippaat.

Siunnersuummi saqqummiunneqartumi siunniussaq pingaarneq tassaavoq innuttaasut inuiaqatigiillu nappaatinut navianartunut tuniluuttunullu illersornissaat.

Pisumik aalajangersimasumik pisoqartillugu iliuisissat inatsisitigut periarfissinneqartut illersorniarluta atortariaqarsinnaavagut, aamma - ilaatigut - ulluinnatsinni killilersuisinnaagaluarpata.

Siorna soorlu aamma tamanna pisarsimavoq.

1945-mi oqaluttuarisaanermi siullermeerunartumik mæslingit Kalaallit Nunaanni atugaalerput. 50-ikkut aallartinneranni maani nunatsinni mæslinginik arlaleriaq nappaalanersuaqarpoq, 1954-imi nappaalanersuup ajornerpaaffiani nunatta kitaani sumiiffimmiit sumiiffimmut siaruaassimasumik.

Inatsimmi atuuttumi maj 1950-imeersumi nappaatit pinaveersaartinniarlugit akiorniarlugillu iliuseqarsinnaanissamut inatsisitigut siammasissumik tunngaveqarpoq:
"Nappaatit pinaveersaartinnissaat akiornissaallu siunertaralugit statsministeri najoqqutaliussaaq".

Mæslinginik nappaalanersuaq akiorniarlugu iliuitsit arlallit atorneqarput, ilaatigut sumiiffiit tuniluuffiusut matuneqartarsimallutik aammalu mæslinginik napparsimasut

immikkoortitaasarlutik. Umiarsuarnik tulattoqartillugu inuit umiarsuarmititut inuillu nunamiittut attuumallutik attaveqatigiittarnissaat pinaveersaartinniarlugu iliutsit atuutinneqarput.

Tamakku saniatigut atuarfiit oqaluffiillu matuneqarput.

Ukiut 70-it qaangiunnikuugaluartut ullutsinni nappaalanersuaqartillugu suli illersorsinnaasariaqarpugut.

Siunnersuut saqqummiunneqartoq assigiinngitsutigut, ukiut 70-it matuma siornamut assingusunik, iliuseqarsinnaanermut periarfissiivoq, iliutsit nutaarpalaarneruinnarlutik. Siunnersuut malillugu pisariaqartitsineq naapertorlugu killilersuinerit, inerteqqusinerit assigisaallu atuutilersinneqarneranni innuttaasut pisinnaatitaaffii aammalu nappaalanersuaqarnerup nalaani inuit inuiaqatigiillu ataatsimut illersornissaat oqimaaqatigiissinniarneqassapput.

Siunnersuummi ersersinneqarpoq iliussisaq suugaluartorluunniit pisariaqartuussasoq, sapinngisamik sivikitsuussasoq, iliuserineqartumilu siunertarineqartumut naammattumik naleqquttuussasoq. Iliuserineqartoq akuliuffiunnginnerpaaq qajassuussinerpaarlu atorneqassaaq, tamanna siunertarineqartup anguniarnissaanut naammassappat.

Taamatut oqaaseqarlunga siunnersuut Inatsisartuni akuersaartumik oqallisigisassanngortippara.